

**Sud Bosne i Hercegovine**
Суд Босне и Херцеговине

Broj: S1 3 IŽ 044005 22 IŽ
Sarajevo, 30.09.2022. godine

Sud Bosne i Hercegovine, u vijeću Apelacionog odjeljenja sastavljenom od sudija Srete Crnjak, predsjednika vijeća, Dinke Bešlagić-Čovrk i Vesne Trifunović, članova vijeća, odlučujući o žalbi političkog subjekta Pokret demokratske akcije, Fra Grge Martića 8, Tuzla, izjavljenoj protiv Odluke Centralne izborne komisije Bosne i Hercegovine, broj 05-1-07-5-7/22 od 23.09.2022. godine, o izricanju novčane kazne, u nejavnoj sjednici, održanoj dana 30.09.2022. godine, donio je

R J E Š E N J E**Žalba se odbija.****O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, odbijena je žalba političkog subjekta Pokret demokratske akcije na Odluku Opštinske izborne komisije Banovići kojom je izrekla novčanu sankciju u iznosu od 3.000,00 KM zbog postavljanja bilborda na javnoj površini za koju nije imao odobrenje nadležnog općinskog organa.

Protiv navedene odluke žalbu je izjavio politički subjekt Pokret demokratske akcije navodeći da je Službi za komunalno stambene poslove, zaštitu okoliša i inspekcije podnijela zahtjev za zauzimanje javne površine na lokaciji u ul. Armije BiH (kod benzinske pumpe Energopetrol), a da je navedena služba donijela rješenje kojim je odobrila privremeno zauzimanje javne površine za postavljanje bilborda i plakata, između ostalih, i na lokaciji u ul. Armije BiH. Takva formulacija znači na istoj strani gdje i benzinska pumpa, dok je na skici navedena lokacija prekoputa benzinske pumpe. Smatra da je greška zbog koje su uložili žalbu Službi komunalno stambene poslove, zaštitu okoliša i inspekcije, koja je odbijena kao neosnovana jer naknadna preciziranja mikrolokacija koja su navedena u žalbi nisu pravno relevantna. Predlaže da sud pobijanu odluku ukine, a prigovor političkog subjekta OO SDA Banovići odbije kao neosnovan.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana.

Ispitujući pobijanu odluku u okviru žalbenih navoda, apelaciono vijeće je odlučilo kao u izreci iz sljedećih razloga:

Žalba nije osnovana.

Iz stanja spisa proizilazi da je politički subjekt Pokret demokratske akcije dana 09.09.2022. godine Centralnoj izbornoj komsiji Bosne i Hercegovine uložio žalbu na Odluku Općinske izborne komisije Banovići od 07.09.2022. godine.

Naime, uvidom u rješenje Službe za stambeno komunalne poslove, zaštitu okoliša i inspekcije Općine Banovići od 01.09.2022. godine proizilazi da je političkom subjektu Pokret demokratske akcije odobreno privremeno korištenje javne površine za postavljanje bilborda između ostalih lokacija i na lokaciji u ul. Armije BiH (kod benzinske pumpe Energopetrol) koja je na grafičkom prikazu označena preko puta benzinske pumpe. Znači lokacije za postavljanje bilborda su precizirane grafičkim prikazom lokacije. Osim toga, iz rješenja sasvim jasno proizilazi koje su to lokacije za postavljanje bilborda. Žalitelj osnovano tvrdi, a što proizilazi iz obrazloženja navedenog rješenja, da su dana 29.08.2022. godine službena lica ovog organa zajedno sa predstavnicima političkih stranaka koje su podnijele zahtjev za postavljanje bilborda, plakata i drugih naprava izašli na lice mjesta, obišli i predmetnu lokaciju i zajednički utvrdili mikrolokacije za postavljanje istih. Međutim, žalitelj ničim ne dokazuje da je nadležna služba napravila grešku u dostavljenoj skici tako što je označila lokacija preko puta pumpe.

Kako je odredbom člana 7.2 stav (3) Izbornog zakona BiH propisano da nadležni organi neće dozvoliti političkim strankama, koalicijama, listama nezavisnih kandidata i nezavisnim kandidatima da postavljaju oglase, plakate, postere, odnosno da pišu svoja imena ili slogane koji su u vezi sa izbornom kampanjom, unutar ili na zgradama u kojima su smješteni organi vlasti na svim nivoima, javna preduzeća, javne ustanove i mjesne zajednice, na vjerskim objektima, na javnim putevima i javnim površinama, osim na mjestima predviđenim za plakatiranje i oglašavanje, to i po ocjeni apelacionog vijeća politički subjekt Pokret demokratske akcije je bilbord postavio na lokaciji za koju, u vrijeme postavljanja istog nije imao odobrenje.

Zbog navedenog, Centralna izborna komisija Bosne i Hercegovine je pravilno utvrdila da se predmetna Odluka Općinske izborne komisije Banovići zasniva na pravilno i potupuno utvrđenom činjeničnom stanju i pravilnoj primjeni materijalnog prava.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravila i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
SUDIJA**

Sreto Crnjak